



## Terenga 4: Hōtaka 17 – Nā/Nō Ehara i...

### He Mihi

Kia ora huihui katoa anō tātou. E kīia nei te kōrero, 'ka whati ana te tai, ka pao te tōrea'. Pao mai, tōrea mā. Kua tumu te tai. Kua rite te papa o Ako.

### Hei Mahi Whakarongo

E hia kē ngā waiata, ngā haka, ngā ngeri rānei kua titoa e Tīmoti i roto i ngā tau. I te uiui e haere ake nei ka rongo tātou ki ana whakamahuki ki tētehi o ana titonga nōna i Te Whare Wānanga o Waikato. Anei ngā pātai hei whakautu mā koutou:

- 1) He aha te kaumātua i mihi ai ki a Tīmoti?
- 2) Nā wai kē te kōrero i tuku ki a Tīmoti?
- 3) Ko wai ngā 'ngutungutu ahi' o te Kīngitanga?

### He Whakamārama

E rua ngā huarahi e whāia ana e te hunga matatau ki te reo, hei whakakāhore i te rerenga e whai ake nei:

**Nāku** tēnā waiata.

1. **Ehara nāku** tēnā waiata.
2. **Ehara i a au** tēnā waiata.

**Nō** tātou tērā whare.

1. **Ehara nō** tātou tērā whare.
2. **Ehara i a** tātou tērā whare.

Anei tētehi o ngā rerenga kōrero i puta i te kōrero a Tīmoti, e kite ai koutou i te huarahi ka whāia e ia.

**"Ehara i a au** ake tērā kōrero, engari i homai e Te Kotahi ki a au."

Ka pēnei hoki tana whakakāhore i te rerenga kōrero e arotahi ana ki te kaimahi:

**Nāku** i tito te waiata.

**Ehara i a au** i tito te waiata.

1. Nō Kahungunu taku pāpā. Ehara i Kahungunu taku pāpā. \*Ehara i a Kahungunu... X
2. Nō taku pāpā ērā hū. Ehara i taku pāpā ērā hū.
3. Nōku tēnei kāmata. Ehara i a au tēnei kāmata.
4. Nā te kura ngā rorohiko hou. Ehara i te kura ngā rorohiko hou.
5. Nāna anō tōna mate i kimi. Ehara i a ia tōna mate i kimi.

### Hei Mahi

**Whakakāhoretia ngā rerenga. Whāia te tauira a Tīmoti.**

1. Nō Te Taitokerau ōna tūpuna.
2. Nāku i tiki taku irāmutu i te kura.
3. Nō konei mātou.
4. Nō te whānau te waka rā.

### Whakautu:

1. Ehara i Te Taitokerau ōna tūpuna.
2. Ehara i a au i tiki taku irāmutu i te kura.
  3. Ehara mātou i konei.
  4. Ehara i te whānau te waka rā.